

衆多不可勝書以一事況十十況百百況千
千況萬萬況億億況無極事各自有家類屬
皆置其事本文於前使曉知者執其本使長
能用者就說之視其相應和中者皆是不
應又不中者悉非也欲知古聖人文書道審
不也此比若呼人得其姓字者皆應鬼神亦
然不得姓字不應雖欲相應和無緣得達故
不應也故古者名學為往精精者乃精念其
事象可宜復思其言也極思惟此書策凡事
畢矣書卷上下衆多各有事宜詳讀之更以
相足都得其意已畢備不深得其要意言道
無致事故見變不能解陰陽戰鬪吾書乃為
仁賢生往付有德有德得之以為重寶得而
不能善讀言其非道故不能樂其身除患咎
也夫大道將見其如無味乎用之不可既乎
衆賢原之可以和剛柔窮陰陽位乎諸文書
畢定各得其所不復憤憤乎惡悉去矣上帝
大樂民無崇乎澤及小徹萬物擾擾不失氣
乎復反於太初天地位乎邪文已消守元烝
乎一者道之綱二者道之橫行三者已亂不

可明也吾道即甲子乙丑六甲相承受五行
轉相從四時周反始書卷雖衆多各各有可
紀比若人一身頭足轉相使一字適遺一字
起賢者次之以相補合其陰陽以言語表裏
相應如規矩始誦無味有久久念之不解驗
至矣災害去身神還聚人自謹良無惡子名
之為無刑罰道化美極也明察吾文以却咎
茲禍自止民自壽原未得本無終始十相
應太陽文也十九相應太陰文也十八相應
中和文也十七相應破亂文也十六相應若
遇中書也十五相應無知書也可言半吉半
凶文也十四中者邪文也十三中者大亂文
也十二中者棄文也十一中者迷中文也十
十中者以下不可用誤人文也隨傷多少還
為人傷久久用之不止法絕後滅門此十
文也
右却邪而致正文法

太平經卷五十一之五十三原缺五十二卷 傳一
校文邪正法第七十八
純稽首戰慄再拜子復欲問何等故純今見
明師正衆文諸書迺為天談也吾恐悖驚不
知可先後當以何能正得此書實哉子欲樂
得其實者但觀視上古之聖辭中古之聖辭
下古之聖辭合其語言視其所為可知矣復
視上古道書中古道書下古道書三合以同
類相召呼復令可知矣今凡書文盡為天談
何故其治時亂時不平願聞之然能正其言
明其書者理矣不正不明亂矣正言詳辭必
致善邪言凶辭必致惡今子難問不止會樂
欲知之欲致善者但正其本本正則應天文
與聖辭相得再轉應地理三轉為人文四轉
為萬物萬物則生浮華浮華則亂敗矣天文
聖書時出以考元正始除其過者置其實明
理凡書即天之道也得其正言者與天心意
相應邪也致邪惡氣使天地不調萬物多失
其所帝王用心愁苦得復亂焉故當急為其
考正之今念從古到今文書悉已備具矣俱

愁其集居而不純集廟相亂故使賢明共疑
 迷惑不知何從何信遂失天至心因而各從
 其忤是也使與天道指意微言大相遠皆為
 邪言邪文書此邪致不能正陰陽災氣比連
 起內欲在此也吾見子問之積着着不忍故
 反覆為子具道其意疾疏吾辭自深思念之
 夫凡事者得而不能專行亦無益也若能行
 之除大謫也夫天文亂欲樂見理若人有劇
 病欲樂見治也何以乎哉然子自若愚耳誠
 無知手劇病不以時治也到于死亡天文不
 治正至於大亂四時為其失氣五行逆戰三
 光無正明皆失其正路因而毀敗人民雲亂
 皆失其居處老弱負荷天死者半國家昏亂
 迷惑至道善德隔絕賢者蔽藏不能相救是
 不大劇病邪故當力正之今愚人日學遊浮
 文更迭為忤以相高上不深知其為大害以
 為小事也安知內獨為陰陽天地之大病乎
 哉天下不能相治正者正此也夫神祇有所
 疾苦故使子來反復問之也見書宜旦夕宿
 夜深惟思其要意不可但自易不為皇天重

計也今帝王無所歸心其咎甚大吾今雖與
 子相對二人而談以為小事內延為皇天是
 正語議不敢苟空妄言其咎在吾身罪重不
 可除也神祇之謫人不可若人得遠避而逃
 也子敢隨吾輕辭使言若俗人陳忤相高上
 也唯唯不敢也見天言且慎且喜誠得盡
 力冀得神祇之心以知天下憂以安帝王令
 使萬物各得其所是願也子願何一獨善
 不可復及也然吾所以常獨有善意者吾學
 本以思善得之故人也老終吾獨得在而吾
 先人子孫盡已亡而吾獨得不死誠受厚命
 慙於倉皇無以自效報之復之也常思自竭
 盡力不知以何効哉見天地不調風雨不節
 知為天下大病常憐之令得神人言大覺悟
 思盡死以自效於明天以解大病而安地理
 固以興帝王令使萬物各得其所想以是報
 塞天重功今不知其能與不哉願復乞問不
 及於明師善哉子之言也今見子言吾尚喜
 何言天哉吾書口口萬不失一也子但努力
 勿懈而理之是可以復天功不復疑也帝王

行之尚且立得其力何況於子哉吾連見子
 之言吾不敢餘力也吾雖先生志不及子也
 今俱與子共是天地願與子共安之吾欲不
 言恐得重過於子反得重謫於天子更詳聆
 之復為子反復悉分別道之正文者迺本天
 地心守理元氣古者聖書時出考元正字道
 轉相因微言解皆元氣要也再轉者密辭也
 三轉成章句也四轉成浮華五轉者分別異
 意各司其忤六轉者成相欺文章句者尚小
 儀其本也過此下者大病也乃使天道失路
 帝王久愁苦不能深得其理正此也子幸欲
 報天恩復天重功天者不樂人與其錢財奇
 偽之物也但樂人共理其文不亂之耳今吾
 見觀子初來學之時以為子但且問一兩事
 而去何意乃欲畢天道乎吾言而不正天道
 畧可見觀夫子樂欲正天地但取微言還以
 逆考合於其元即得天心意可以安天下矣
 拘校上古中古下古之文以類召之合相從
 執本者一人自各有本事凡書文各自有家
 屬令使凡人各出其材圍而共說之其本事

字情實且悉自出收聚其中要言以為其解謂之為章句得真道心矣可謂為解天之憂大病去矣可謂除地之所苦矣可謂使帝王遊而得天心矣可謂使萬物各得其所矣是者萬不失一也吾見子之言口口知為天使吾不敢欺子也今欺子正名為欺天令使天不悅喜反且滅吾年名為負於吾身又上慙於皇天復無益於萬民其咎甚大子努力記之但記吾不敢有遺力也唯唯見師言也心中恐駭既為天問事不敢道留止也猶當竟之耳師幸原其不及示告其難易故敢具問其所以今文書積多願知其真偽然故固若子前日所問耳十百相應者是也不者皆非也治而得應者是也不者皆偏行也欲得應者須其民臣皆善忠信也何以言之然子賢善則使父母常安而得其所置妻善則使夫無過得其力臣善則使國家長安帝王民臣俱善則使天無災變正此也子寧解耶不解耶行吾今欲與子共議一事今若子可刺取吾書寧究洽達未哉小子童蒙未得其意子

試言之吾且觀子具解不令若愚生意欲悉都合用之上下以相足儀其事百以枝千千以枝萬更相考以為且可足也不者恐不能盡周古文也然子今言真是也子前所記吾書不云乎以一況十十況百百況千千況萬萬況億正此也唯唯願聞其枝此者皆當使誰乎各就其人而作事之明於本者恃其本也長於知能用者共圖而說之流其語從帝王到于庶人俱易其故行而相從合議小知自相與小聚之歸於中中知聚之歸於上知上知聚之歸於帝王然後眾賢共圖而平其說更安之是為為謀及下者無遺算無休言無廢文也小賢共枝聚之付於中賢中賢枝聚之於大賢大賢枝聚之付於帝王於其口口成理文是之無誤真得天心得陰陽分理帝王眾臣共知其真是是後下於民間令天下俱得誦讀正文如此天氣得矣太平到矣上平氣來矣頌聲作矣萬物長安矣百姓無言矣邪文悉自去矣天病除矣地病亡矣帝王遊矣陰陽悅矣邪氣藏矣盜賊斷絕矣中

國盛興矣稱上三皇矣夷狄却矣萬物茂盛矣天下幸甚矣皆稱萬歲矣子無閉塞吾文唯唯不敢蔽匿也既受師辭誠報歸之匿之恐為重罪成事也善哉子之言也已得天心子名為已報天重功唯唯誠得還歸閑處思其至意不解懈也行去矣勿復疑也

右考文訣

太平經卷五十一